

2 Timoteo

Jachuayama

¹ Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo sonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē n̄yetsca tescama yomna tšabe vida chamot-sebomnama; y chca vida montsebomna Cristo Jesúsēftaca cānyīñe mo can̄yácá bētsemnayeca.

² Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma áceñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

Ndoñe ntsēuatjana entšángbeñe Jesucristbiamá jóyebuambayama

³ Sempre Bēngbe Bētsáftaca stsencuénta ora, acbiama sēndbētsenojuabnaye, y acbiama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bētsemnama, cachcá ntšamo atšbe bēts taitanga tmojanmcá. ⁴ Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētīnyama, atše

puerte oyejuayá chaitsemnama. ⁵ Bëngbe Bëtsá acbiamá sëndbatschuaye, er atše sëndbátenujuaboje aca Jesucristbeñe ndegombre ošbuáchiyana condbomnama. Natsana, acbe bëts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndétatsëmbo.

⁶ Chíyeca sempre cochtsantješna quem uámana soyama: Mo nda canye shinýañe tojtsajuinýinýnacá, chentše sempre chaotsoiñama, cachcá aca, chë Bëngbe Bëtsá tcmojatšetá obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšašiñe sënjanjajó y Bëngbe Bëtsá acbiamá sënjanimpadá ora. ⁷ Er Bëngbe Bëtsá tonjama bëngbe ainaniñe Uámana Espíritu chaotsemándama,

uatjana ndoñe ntsebomnama, ndayá obenana bënga chamotsebomnama, bonshánana Bëngbe Bëtsabiamá y nyetscangbiamá chamotsebomnama, y cabënga jenomándama chamotsobenama.

⁸ Chíyeca, ndoñe cattšéuatja entšanga jáuyanama, ntšamo tcojinýe y cojtsetatsëmbcá Bëngbe Utabnabiamá ndegombre bëtsemnama; ni atšbiamá ndoñe cattšéuatja, atše cárceloje sëndutámenama, chabiamá oservena causa. Chamna, chë Bëngbe Bëtsá cmochanjátšetaye obenánaca, sempre cochtseprontana jasúfriama, átšeftaca y ínýengaftaca, entšanga tšabe noticiënga abuyiynaye causa. ⁹ Bëngbe Bëtsá endmëna

nda bënga šojatsebacá, y šojáchembo jtsiyenama mo chábenga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama

inabōseyeca y bēngbe tšabiamá juabna bómnyayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamá jamama sóyeca. ¹⁰ Y mora, Bēngbe Atsebacayá Jesucristo tojáboyeca, Bēngbe Bētsá šojinyanýé cha bēngbe tšabiamá juabna yobomnama. Jesucristo tonjama, entšanga nýetsca tescama obanēnga ndoñe chamondétsemnama, y tonjama bēnga chamotsetatšēmbuama, chē tšabe noticiēnga chabiamá jouenēse y joyeunayēse, bēnga chē nýetsca tescama yomna tšabe vida mochjábomnama, ndoñe nýe jopochócama cuerpēnguiñe.

¹¹ Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. ¹² Chē causa, atše mora cárceloca quem soyēnga séntsesufrina; pero chama atše ndoñe quetsátēuatja, er atše sēndétatšēmbo ndábeñe atše stsošbuáchema, y corente sēndétatšēmbo cha yobena jtsinýenana ndayá šojabonyecá, chē ndayté cha yochjésabēntscuana.

¹³ Nýets tempo, chē ndegombre buayenánana, ndayá átšbentšana tconjanuencá, entšanga cochtsabuayiynaye, entšanga jtsinýanýenayēse aca Jesucristbeñe icošbuáchema, y Bēngbe Bētsá y nýetscanga icuababuánýeshanama, y chca yomna aca Cristo Jesúsēftaca cánýiñe mo canýacá bétsemnayeca. ¹⁴ Chē Uámana Espíritu, chē bēngbe ainaniñe endoyenabe uajabuáchenanaca, ntšamo Bēngbe Bētsá tcmojabonyecá sempre cochtsinýena.

15 Ntšamo ya condětatsëmbcá, nyetsca ošbuáchiyënga Asia luaroquënga cachcá šmonjesonýá, y chentše bontsemna Figelo y Hermógenes. 16 Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. 17 Masna, Romoye tojabánashjango ora, cha botamana šojánguango y šonjáninýena. 18 Bëngbe Utabná lastemado cháftaca chaotsemna, ntšamo nyetscanga tmojamcá tšabá o ndoñe tšabá yontsemnama cha yochjayana ora. Aca corente condětatsëmbo ntsachetšá Onesíforo Efeso puebloca šonjanëjabuachama.

2

Jesucristbiana canye tšabe soldado

1 Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebomna. 2 Ntšamo ba entšangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábanýiye, y chamotsobena ínýenga cachcá jabuátambama.

3 Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuyaiynaye causa, ainaniñe bëts añemo cochtsebomna, mo canye tšabe soldadcá, cha chabe mándayabiana jasúfriana. 4 Ndocna soldado ntjátanana shjoca soyënguiñe vida jtsebomnama o crocénana juácanama. Soldado chca jtšamana, chabe mandayá, chca chaotsemnama tbojabocacá cha,

oyejuayá chaotsemnana. ⁵ Y canye travisiayá, ínÿenga jáyënjanama, canye soye juácánama; pero ntšamo chë uacánánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶ Chë jajañe trabajayá derecho jtsebomnana chë natsaná jtsemnana, chë tmojatbaná sananguentšana ndayánaca jtsebomnana. Acaftaca cachcá echanjopása, chë trabajo tšabá chacojamëse. ⁷ Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

⁸ Sempre cochtsenójuabnaye Jesucristbiana, ndabiana Bëngbe Bëtsá tojanma cháuatayenama y enjamna canya rey Davídbentšana entšá, ntšamo atše chabiana sëndabuayiyná tšabe noticiënguñe endmëncá. ⁹ Chca abuyiynaye causa, atše sëntsesufrina, nya cadenëjuangácnaca utsbuaná, mo canye bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entšángbioye montsabatambá. ¹⁰ Chiyeca atše nyetsca padecena soyëngaca sëndëtsóboyana, Bëngbe Bëtsabe bocacánëngbe tšabiana, chëngnaca atsebácanënga chamotsemnana, Crístbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nyetsca tescama chamotsiyenama.

¹¹ Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oye-nana ntšamo tempo monjanियencá y Jesu-

crístbeñe montsošbuaché;
 y chca, bēngnaca cháftaca mochantsiyena;
¹² bēnga chē padecena soyēngaca tmojtseufrina
 ora,
 tmojtsemorochēse, bēngnaca Jesucrísoftaca
 mochántsemandaye.
 Bēnga tmojayana, cha ndoñe monduabuatma ca,
 as cha bēngbiámnaca cachcá echanjayana;
¹³ bēnga chábeñe ndoñe tmontsošbuáchese,
 masque chca, cha cabá echanjama ntšamo tbo-
 jašebuachenacá,
 er cha lempe jamana, ntšamo sempre iuetsemncá
 jtsinñanñayēse.

*Canñe trabajayá, ndáftaca Bēngbe Bētsá
 jtsóyejuayana*

¹⁴ Chē tcbonjauyana soyēngama, cochjama
 chē entšanga chamotsenójuabnama, y Bēngbe
 Bētsabe delante cochjábuayenaye chēnga ndoñe
 yontsamna nñe palabrēngama jabuachana
 enatsētsnayana; er chca, ndocna tšabe soye
 ntjamana, y chca tmojtseatsētsná ora,
 jamana chē soye ouenanēnga más batšá
 chamotsošbuáchema, y jujabuáchana chēngbe tšabe
 juabnēnga jtsondbiamama. ¹⁵ Lempe ntšamo
 icobencá cochtsama, aca chacotsemnama mo
 canñe entšá ndabiamama Bēngbe Bētsá cháuyana
 nñetsca soyēnguiñe tšabá amá yomna ca; aca
 chacotsemnama mo canñe trabajayacá, nda
 tondaye tontsebomna ndayama jatēuatjama; y
 chacotsemnama chē ndegombre buayenánana
 corente tšabá buatēmbayá. ¹⁶ Entšanga nñe quem
 luarentša soyēngama, ndoservena palabrēnga

tmojtsencuénta ora, chë soye ndoñe cattsuena; er chë soye jamana entšanga puerte inyetšá chamobocanama, ntšamo Bëngbe Bëtsá ndoñe yondmëncá, inyetšá jtsejuabnayëse y jtsamëse. ¹⁷ Chëngbe buatëmbana soyëngaca puerte bacá ínÿengbioye jáborlana, nÿa mo canÿe uabouana šocana chamotsebomnama cuafjamcá. Chca buatëmbayënguentše Himeneo y Fileto bontsemna. ¹⁸ Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nÿetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entšanga chë ntšamo Jesucristbeñe imojanošbuachecá, mora ya ndoñe chamondëtsošbuáchema. ¹⁹ Pero Bëngbe Bëtsabe ndegombre buayenánana nÿets tempo cachcá endesomñe, y ndocná quenátobena chë soye jatrócama. Chca endmëna mo chë ndëtšbenga ndayiñe canÿe bëts yebna tojebncá, ndayiñe mëntšá yojtsábemana: “Bëngbe Utabná endëubuatma chë chábenga imomnënga”, y “Nÿetscanga chë Bëngbe Utabnábenga imomnënga ca tmojtsichámënga, chamuajbaná nÿetsca bacna soyënga amana ca”.

²⁰ Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauetsoservénama. ²¹ Chca endmëna chë Jesucristbeñe imojtsošbuachëngbeñe,

ndoñe nyetscanga tmontsajbaná bacna soyënga juabnayana y amana, ni chë chca tmojtsama entšángbentsana ndoñe tmontsojuaná. Pero, chca jtsojuánañama tojtsebošá, echántsemna canya Bëngbe Utabnabiamá tšabe trabajayá; y chca, mo chë tsafjoca castellano y midio soyëngcá, canye uámana trabajuiñe echanjosérvia, y cha sempre echántseprontana ndaye tšabe soye jamama.

²² Chiyeca, ntšamo básefta bobontsënga bacna soyënga jamama mondbošcá, ndoñe cattsama; pero aíñe cochtsiyena ntšamo Bëngbe Bëtsabe bominyiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nyetscángaftaca natjëmbana cochtsomñe, chë chaújabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebomncá. ²³ Ndoservena soyëngama palabrenga y ndosertánentsana óbocana soyëngama ndoñe cattsuenana; aca corente condétatsëmbo chë soyënguentsana entsanga nye jabuachana enatsëtsnayañe jabocanana. ²⁴ Pero chë Bëngbe Utabnabiamá oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nyetscanga jtsënÿayana, jtsemnana tšabe buatëmbayá y ínÿengaftaca uantadá. ²⁵ Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana

chamotrocama, y chca, chënga chë ndegombre soyëngama chamotsetatšëmbuama; ²⁶ chënga botamana chamuatsjuaboma, y Bëngbe Bëtsá, Satanásbe cucuatšënguentsana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

3

Ntšamo entšanga mochtsemna, Cristo jésabama chaojtsobeco ora

¹ Pero aca cmontsemna jtsetatšëmbuana, Cristo jésabama tempo chaojtsobeco ora, entšanga echántsamna puerta padecena soyënguiñe jtsiyenana. ² Chca echántsemna, er entšanga, cada ona nÿe cachabe tšabiamá echanjësenojuabnaye, crocénana jtsebomnama tša mochántseboše, mochántsemna enábotamnayënga y ínÿengbioye mo nduamanëngcá mochantsënÿaye. Bëngbe Bëtsabiamá y ínÿengbiamá bacá mochantsóyebuambnaye, chëngbe bëtsétsangbioye ndoñe quemochátayaunana, ni chëngbiamá tšabe soyënga tmojtsamëngbioye quemochtëtacheuanaye, y Bëngbe Bëtsabiamá y chabe soyëngama ndoñe respeto quemochátsbomna, ³ ni cachëngbe pamíllangbioye quemochátababuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga. ⁴ Chënga, uayayëngbe cucuatšiñe entšanga ayentšbáshejuanënga

mochántsemna, mochántsama soyënga tondayama ntjatsrreparánëse, y cachënga uámana entsangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. ⁵ Inyënga echantsinyana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínyanÿiye, Bëngbe Bëtsá obená bëtsemnama chënga ndoñe mondošbuáchema.

Nÿa tondayama chëngaftaca cattsencuëntaye. ⁶ Chënguentsë báseftanga mondmëna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá. ⁷ Chënga nÿets tempo nÿe ndaye tsëm soye jatóntsana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entsanga chëngbe juabniñe nÿe bacna soyënga jtsebmomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entsanga jáyënjanama, er nÿetsca entsanga mochanjátatšëmbona chënga nÿe bacna soyënga juabnayënga imomnana, mo

chë Israeloca entšanga tmojantatšëmboncá Janes y Jambres nÿe chca juabnayata bëtsemnama.

Inÿe soye Timotéobioye tbojanbonÿe

¹⁰ Pero acna, puerte tšabá condétatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, ¹¹ ínÿenga šmonjanacmena ora; y sënjansufrina ora, padecena soyënguifne bëts añemo tsjánbomna. Acnaca condétatšëmbo ntšamo atše chama Antioquía, Iconio y Listra bëts pueblëngoca tsjansufrinama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. ¹² Ndegombre endmëna, nÿetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúseftaca cánÿiñe mo canÿacá imomnënga, puerte mochanjasúfria, chca bëtsemnama, chënga chamosufrima ínÿenga chamojtsama ora; ¹³ pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñénënga mochántsemna.

¹⁴ Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga;

15 y aca, cabá b́asetema conjamna orscana, ch́e B́engbe B́etsabe uabemana palabrengama cond́etatsh́embo, ch́e ndaye śoyeca aca contsobena juatsj́inyana, B́engbe B́etsá chacmatsbocama, Cristo Jeśusbeñe jtsosh́uáchiyese. 16 B́engbe B́etsá, Uámana Esṕiritbeyeca tonjama, lempe ntsh́amo B́engbe B́etsabe uabemana palabrenguiñe yobinýncá entsh́anga chamuábemama. Ch́e uabemana palabra endoservena, b́engbioye ch́e ndegombre soyenga jabuátambama; nderado ndaye soye ndoñe tsh́abá tmonjamama b́enga chamotsetatsh́embuama, jinýanýiyama ntsh́amo más tsh́abá ch́e soyenga muanjobenaye jamama; y b́engbioye jabuátambama ntsh́amo jtseyenama ch́e B́engbe B́etsabe bominýiñe tsh́abá yomna soyenga jtsamése; 17 chca, canýe entsh́a B́engbe B́etsabiamama oservená y obená chaotsemnana, tsh́abá chaotsetatsh́embo y sempre chaotseprontana nyetsca tsh́abe soyenga jtsamama.

4

1 B́engbe B́etsabe delante y Cristo Jeśus, nda echanjabo mo reycá jabomándama y jabáyanama ch́e ainéngbiamama y ch́e ya mochj́obanéngbiamama, ntsh́amo ch́engbe vidénguiñe tmojtsemcá tsh́abá o ndoñe tsh́abá b́etsemnana, chatbe delante cbomandá, 2 B́engbe B́etsabe palabra entsh́anga chacotsabuayinyayama; siempre chca jamama cochtseprontana, masque entsh́anga aíñe o ndoñe jouenama tmojtsebošese. Cochjama, ínýenga bacna soyenga tmojtsamama chamotsetatsh́embo, chca tmojtsamama cochjucácana y cochj́abuayenaye ndayá jamama

yojtsamnana. Sempre chca cochtsabuátambaye, chca ora puerte uantado jtsemnëse. ³ Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsicamo soyënga nÿe ntšamo cach entšanga jouenama tmojtsebošcá. ⁴ Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. ⁵ Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebmna; chë Jesucristbiana tsabe noticiënga entšanga abuayiynayabe trabajo cochtsama; y nÿa cochtsentšena ndayá Bëngbe Bëtsá tcmojabonÿecá tšabá jtsamama.

⁶ Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnama. ⁷ Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. ⁸ Chcasna, atšbiana canÿe uacanana soye echántsemna, er Bëngbe Bëtsá tojama atše chabe bominiñe tšabia chaitsemnama. Bëngbe Utabná endmëna chë

ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nýe atše ndoñe chë uacanana soye quešochtétatšetaye, ndayá nýetscángbioye chca, ndëmuanýenga puerte imoboše cha cachiñe cháuesabama, cha imobobonshánayeca.

Inýe soyënga Timoteobiana

⁹ Lempe ntšamo tcojobenacá cochjama betsko jabama atše jabínýama; ¹⁰ er Demas, cha yapa nýe quem luarentša entšangbe soyënga bošá enjamna, cha cachcá šonjesonýa y Tesalónica puebloye tojtsoñe. Crescente Galacia luaroye tonjá y Tito Dalmacia luaroye. ¹¹ Nýe Lucas, chë šmonjanájabuachanënguentshana, mora átšeftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama puerte oservená endmëna. ¹² Tíquico, Efesoye sënjichmó. ¹³ Chacojabo ora, uabonjanía šcochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbe.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. ¹⁵ Chabiana cuedado cochtsebmna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

16 Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nÿetscanga cachcá šmonjësonÿaye. Pero atše sentsobátmana, Bëngbe Bëtsá chama chënga chaotsaperdoná. 17 Pero Bëngbe Utabná aíñe šonjanájabuache y tonjanma atše bëts añemo jtsebomnama, y chcace, atše sënjanobená Jesucristbiana nÿetsca chabe tšabe noticiënga entsanga jábuayenama, y chë luarentša ndoñe judiënga tmonjanobená chë soye jouenama. Mëntsá, Bëngbe Utabná canÿe uabouana resjuentsana šonjanatsbocá, mo canÿe león jtsosañámentsana ndábioye cuafjatsbocacá, 18 y Bëngbe Utabná šochanjatsbocá, bacna soye ndocná chašondëborlama; y sempre jtšinÿenëse, celoye, chë ndayentše cha yománda luaroye šochanjesbetše. ¡Nÿetscanga nÿetsca tescama cha chamotsatschuaná! Chca chaotsemna.

Pablo Timotéobioye jadiósoftanama

19 Atšbe cuenta cochjácheuaye Prisca y Aquila, y Onesíforbe pamílnaca. 20 Erasto, Corinto puebloca tontsoquedañe, y Trófimo Mileto puebloca šocá sënjëftseboshjona. 21 Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

22 Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022
19104c0e-9046-5ff3-82fb-eb838c88dcf9